

1 Tesalonicenses

Jacheuayama

¹ Atše Pablo, Silvano y Timotéoftaca, quem tsbuanácha sentsabiamná tšëngaftangbiamá, chë Tesalónica bëts puebloca Jesucristbeñe ošbuáchiyëngbiamá, tšëngaftanga chë Bëngbe Bëtsá chë Taitá y Bëngbe Utabná Jesucristoftaca cánÿiñe mo canÿacá šmomnënga. Atše sëntseimpadana Bëngbe Bëtsá, chaoma tšabe bendicionënga tšëngaftangbeñe chaotsemnama, y tšëngaftanga ainaniñe tšabe ebionana chašmotsebmnama.

Pablo Bëngbe Bëtsábioye tbojtanchuá chë Tesalónica pueblentša entsangbe ošbuáchiyama

² Bënga sempre Bëngbe Bëtsá fsëndëtschuaná tšëngaftangbiamá, y bënga cháftaca ftsencuénta ora, tšëngaftangbiamá fchandbëtseimpadana. ³ Bënga, Bëngbe Bëtsá chë Taitáftaca ftsencuénta ora, fsëndbëtsenojuabnaye ntšamo tšëngaftanga šmotrabájama, Jesucristbeñe ošbuáchiyana šmobómnyeyeca; ntšamo tšëngaftanga tša ínÿenga šmëjabuáchana, Jesucristo šmobobonshánayeca; y ntšamo tšëngaftanga, ndocna te ntja-jbanacá, jtšošbuáchiyëse Bëngbe Utabná Jesucristbeñe šmobátmanama. ⁴ Jesucristbeyeca catšátanga, bënga fsëndëtatšëmbo Bëngbe Bëtsá cmababuánÿeshanama, y cha tcmojábacacama chábenga chašmotsemnama. ⁵ Bënga chë tšabe noticiënga Jesucristbiamá tcbonjanabuayená ora, ndoñe nÿe bënga jóyebuambayëse chca

quenjatsmäna, ndayá chë Uámana Espíritbe obenanácna, y bënga corente jtsejuabnyäse chë buayenánana ndegombre soye bétsemnama. Tšëngaftanga corente šmondétatsëmbo ntšamo bënga ftsjamna tšëngaftangaftaca fsënjamna ora, tšabe soyënga tšëngaftangbiana nguayinë.

⁶ Chora, ntšamo bënga fsënjanamcá y ntšamo Bëngbe Utabná enjanियená, tšëngaftanga šmonjanontsé amana; y chë buayenánana šmonjanóyëngacñe chë Uámana Espíritu tcmojanatsatá oyejuayánaca, masque ínÿenga tmojamna tšëngaftanga puerte chašmosufrima. ⁷ Mëntsá, tšëngaftanga uánatsanënga šmonjanobiana ntšamo ndegombre jtsiyenama, nÿetsca Macedonia y Acaya luarentša Jesucristbeñe ošbuáchiyëngbiana. ⁸ Tšëngaftanga šmojoyebuambá Bëngbe Utabná Jesucristbe palabrama. Mora, ndoñe nÿe Macedonia y Acaya luarentše entsanga chama quemátstatšëmbo —nÿets luarenache entsángnaca montsetátšëmbo ntšamo tšëngaftanga Bëngbe Bëtsábeñe šmojtsošbuáchema —y chca, bënga tondaye más quešnátëjaboto tšëngaftangbiana jatichámuama. ⁹ Cach entsanga montsoyebuambná chë bënga tcbonjánabuache ora tša tšabá tšëngaftanga šcojanëbuajama. Chëngnaca montsichamo ntšamo tšëngaftanga šmojtsajbaná chë šmojanjuabná diosënga yojamna soyënga adórayana y šmojanontsé chë tšabe benache jtishachama, y chë Bëngbe Bëtsá ndegombrá y ainá jaserviama, ¹⁰ y chca, chabe Uaquiñá Jesús jobátmama; mua

celocana echanjésabo; chabiamá Běngbe Bětsá tojanma obaněnguentšana cháuatayenama, y chá šochanjátsebacaye chě uabouana castigüentšana, Běngbe Bětsá entšangbe bacna soyěngama chěngbiamá yobomnentšana.

2

Ntšamo Pablo yojantrabája Tesalónica puebloca

¹ Cach tšěngaftanga, Jesucristbeyeca catšátanga, šmondětatsěmbo běnga tcbonjánabuache ora ndoñe nye bonamente quenjatsměnama. ² Tšěngaftanga šmondětatsěmbo, běnga cabá tšěngaftangbioye nda ora, Filiposoca šonjaněyánguango y bacá šonjánaborlama; y masque tšěngaftangbioca běngbe contra entšanga monjamna, Běngbe Bětsá tonjanma běnga fchayobená chě tšabe noticiěnga bětscá añémoca jabuátambama. ³ Er běnga entšangbioye bostero soyěnga ndoñe queftsjatanabuayiyná, tšěngaftangbiamá bacna soyěnga ndoñe queftsjatanboše, y entšanga jáingñama ndoñe queftsjatanoyebuambná. ⁴ Běngna inyětšá; Běngbe Bětsá yojanjuabná běnga chabe trabajo jamama obeněnga ftsjamna ca, y chca, šonjaněbuáyana chabe tšabe noticiěnga entšanga jabuátambama, y chca běnga fsěndoyebuambná; chíyeca běnga ndoñe nye entšangbe bominyiñe tšabá chaotsinyñama queftsátama, ndayá nye Běngbe Bětsabiamá, nda chě ndayá běngbe ainaniñe yomnama yotátšěmbo. ⁵ Ntšamo tšěngaftanga corente šmondětatsěmbcá, běnga ndocna te tšěngaftangbiamá tšabe soyěnga tifjánayana, tšěngaftanga běngaftaca oyejuayěnga

chašmotsemnama; y ntšamo tšëngaftanga cbonjanëtsëtsnacá ndoñe quenjatsmëna nÿe tšëngaftangbentšana ba soyënga bëngbiana josháchiñama. Bëngbe Bëtsá chama yotátšëmbo. ⁶ Ndocna te bënga queftsatsnguá entsanga más uamanëngcá bënga chašotsabiamnama, ni tšëngaftangbentšana, ni ínÿengbentšana.

⁷ Masque bënga, Cristbe ichmónënga bétsemnama, matifjanobená tšëngaftanga nÿe sempre jtsamëndayana, bënga ndoñe chca chibiátanma; bënga corente jtsababuánÿeshanëse cbonjánanÿena, ntšamo canÿe mamá chabe básenga jtsabëchayana y corente bonshanánaca jtsanÿenana. ⁸ Tša cbonjánababuanÿeshanayeca, bënga ndoñe nÿe chë Bëngbe Bëtsabe tšabe noticiënga checbënjatanabuayená, tšëngaftanga chiñe chašmotsošbuáchema ntšamo bënga fsëndošbuachecá, ndayá bëngbe vidënga jáshbiamnaca fsënjanprontana tšëngaftangbe tšabiana. ¡Tša cbondábabuanÿeshana!

⁹ Jesucristbeyeca bëngbe catšátanga, tšëngaftanga šmenaboutínÿna ntšamo bënga bëtscá y jabuache fsënjantrabajama, Bëngbe Bëtsabe tšabe noticiënga abuayiyayinÿe y bëngbe vida onguayinÿe, chca, tšëngaftanga ndoñe chacmondëtsamnama bëngbe uajabótama bënga jatatsatnayama.

¹⁰ Cach tšëngaftanga šmondëtatšëmbo y Bëngbe Bëtsánaca, ntšamo bënga ftsjamna tšëngaftanga chë ošbuáchiyëngaftaca fsënjamna ora; fsënjanienana ntšamo Bëngbe Bëtsá tšabá tbojtsinÿancá, nÿetscángaftaca fsënjánama ntšamo jamama šojanamncá, y ndocná quenátobena jatichámuana

ntšamo fsënjanamcá ndoñe tšabá yonjamna ca. 11-12 Tšëngaftanga šmondétatšëmbo, bënga bëtscá jóyebuambayëse cada ona tšëngaftanguentsá cbonjanéjabuachanama y cbonjánáñemuama, ntšamo canye taitá chabe básengaftaca endbetsamcá. Bënga bëtscá cbonjanëtsëtsná ntšamo Bëngbe Bëtsá tšabá tbojtsinýancá chašmotsiyenama; y Bëngbe Bëtsá cmontsëbuájajana chabe amëndayoye jamashënguama y chabe obenana y buashinýinýanana jinýama.

13 Bënga, Bëngbe Bëtsabe tšabe soyënga cbonjanabuayiyná ora, ntšamo tcbonjanëyancá tšëngaftanga šmonjanuena y šmontsanošbuaché mo Bëngbe Bëtsábiocana buayenanancá, y ndoñe nýe entšangbe oyebuambnayanácá. Y ndegombre Bëngbe Bëtsabe buayenánana endmëna, y chë palábraca, tšëngaftanga chë chábeñe ošbuachiyëngbeñe Bëngbe Bëtsá bëtscá soyënga yojtsama. Chama sempre Bëngbe Bëtsá fsëndëtschuaná. 14 Jesucrístbeyeca catšátanga, cach tšëngaftangbe luarentša entšanga cmonjanëcamena ora y šmonjansufrina, šmonjanpasá ntšamo chë Judeoca Bëngbe Bëtsábeñe ošbuachiyëngcá enefjuanënga tmonjanpasacá, y chëngna Cristo Jesusbe entšanga mondmëna. Chënga tmonjansufrí cach luarentša entšanga, chë judiënga, chëngbioye monjanëcamena ora. 15 Chë judiëngbe bëts taitanga, Bëngbe Bëtsabe juabna oyebuambnayëngbioye tmojtsanëbaye, y ntšamo chëngbe bëts taitanga tmojanmcá, chëngnaca Bëngbe Utabná Jesúsbioye tmojanóba, y chënga mondama bënga chaftsesufrínama. Chënga ndoñe

tšábenga Bëngbe Bëtsabe bominjíñe quemátsmëna, y nyetsca entsangbe contra montsemna. ¹⁶ Chë ndoñe judiëngbioye, Bëngbe Bëtsá cháuatsebacama jábuayenama fstseboše ora, chë judiënga bëtská jtsamana bënga ndoñe fchandobenama chca jamama. Judiënga nyets tempo bacna soyënga monjánama; pero chë entsanga jábuayenama bënga ndoñe fchandobenama jtsamana, entsemna chë último bacna soye ntšamo chë judiënga jamama imojtsobencá, más ya ndoñe; y mora, cabana, Bëngbe Bëtsá ya puerta chëngaftaca tbojetna y echanjácastigaye.

Pablo tša yojánboše, Tesalónica puebloca entsanga jányama

¹⁷ Jesucrístbeyeca catšátanga, bënga tšëngaftangbentšana baseftayté jëftsebocnama šonjanotocá ora, masque ndoñe choca tšëngaftangaftaca queftsjátanmëna, sempre tšëngaftangbiama fsënjanenojuabná, y tša fsënjánboše tšëngaftangbioye jtésana jautsëtsayama. ¹⁸ Bënga fsënjánboše tšëngaftangbioye jésana; chíyeca cach atše Pablo, ba soye sënjanóshenguënja jobenayama choye jésama, pero Satanás yojantrabája bënga ndoñe fchandobenama chca jamama. ¹⁹ Atše sëntsanboše tšëngaftanga jautsëtsayama, er tšëngaftangbeyeca Bëngbe Utabná Jesusbe delante, cha yochjésabo ora, ntšamo tšëngaftanga šmoyenama, bënga puerta jtšošbuächiyëse fchantsobátmana, corente oyejuayënga fchtsemnana y más bëtsëtsanga fchtsemnana. ²⁰ Aíñe, ndegombre, ntšamo tšëngaftanga šmoyenama, bënga bëtská añémoca ntšamo

tšëngaftangbeñe tifjamama fsëndbétsoyebuambnaye, y tša oyejuayënga fsëntsemna.

3

1 Chíyeca ya ndoñe chibiatanobená más jatobátmanana tšëngaftanga jautsëtsayama; as fsënjanjuabó nýe bëndata Atenas bëts pueblentše joquédana, ² y jíchmuana Jesucrístbeyeca bëngbe catsata Timoteo, chë bëngaftaca trabajayá, Bëngbe Bëtsábioye oservéniñe, tšabe noticiënga Cristbiana entsanga abuayiynayiñe. Fsënjanichmó chacmañémuayama y chaotsamama tšëngaftanga Jesucrístbeñe más chašmotsošbuáchema; ³ y chca, ndocná Jesucrístbeñe ošbuáchiyana chaondájbanama, masque tšëngaftanga Jesúsbeñe ošbuáchiyënga bétsemnama, ínýenga imojtsama chašmotsesufrínama. Er cach tšëngaftanga šmondëtatšëmbo bënga šojtsamna chca quem larentše jëftsepadecénana. ⁴ Y cabá tšëngaftangaftaca fsënjëftsemna ora, tcbonjanëyana bënga šojánamna jasúfriana; y ndegombre chca tonjopasá, ntšamo tšëngaftanga ya šmondëtatšëmbcá. ⁵ As y chë tšëngaftangbiana jtsetatšëmbuama más jatobátmanana ndoñe quetstétsobenayeca, sënjanjuabó šojétsemna Timoteo jíchmuana. Sënjanichmó atše jtsetatšëmbuama aiñe bëtscá o ndoñe tšëngaftangbe ošbuáchiyana Jesucrístbeñe tayojamnama, er atše yapa sënjanjuabná nderado Satanás tojanma tšëngaftanga bacna soyënga chašmotsamama, y chca, bëngbe trabajo tondayama chaondëtsoservénama.

⁶ Pero mora, Timoteo tšëngaftangbiocana tontashjango y tonjúshjango noticiënga, y bënga chama

oyejuayënga fsëntsemna, ntšamo tšëngaftanga bëtscá Jesucrístbeñe šmojtsošbuáchema y nyetscanga šmenbobonshánama. Cha šonjacuntá ntšamo tšëngaftanga corente oyejuayënga bëngbiana šmuatenujuabnama, y ntšamo tšëngaftanga tša šmojtseboše bënga jányama, cachcá ntšamo bënga tšëngaftanga jányama tša fsëntsebošcá. ⁷ Quem sóyeca, Jesucrístbeyeca catšátanga, y mora chë bënga nyetsca chë padecena soyënga fstsebmna ora y ínÿenga bënga jasúfriama imojtsama ora, bëts añemo fsëntsebmna, ntšamo tšëngaftanga tša Jesucrístbeñe šmojtsošbuáchema jtsetatšëmbëse. ⁸ Jtsetatšëmbuana tšëngaftanga sempre puerte tšabá Bëngbe Utabnáftaca šmoyenama, entsama bënga más añémoca chaftsiyenama. ⁹ Mora fchantsobena Bëngbe Bëtsá jtsatschuanayana tšëngaftangbiana, y chë tšëngaftangbeyeca chabe delante bënga oyejuayana ftsbomnámnaca. ¹⁰ Cada te, bnëté y ibeta, tša Bëngbe Bëtsá fsëndétseimpadana jobenayama tšëngaftanga jautsëtsayama chašualesenciana, Bëngbe Bëtsabe palabra tšabá chašmobedecema, chë buayenánana ntšamo yojtsashbencá jabuátambama.

¹¹ Bënga, Bëngbe Bëtsá fsëntseimpadana, cachá y Bëngbe Utabná Jesús, chašújabuache bënga fchayobenama tšëngaftangbioye jama jautsëtsayama. ¹² Y Bëngbe Utabná chaoma más bëtscá chašmotsenbobonshánama, y cachcá corente nyetscángaftaca, ntšamo bënga cbondababuanÿeshancá. ¹³ Chca, tšëngaftangbe ainaniñe bëtscá añemo šmochántsebmna; y

Bëngbe Utabná Jesús cachábengaftaca chaojésabo ora, Bëngbe Bëtsá Bëngbe Taitabe delante ndocná chaodayana, ntšamo tšëngaftanga šmojamcá ndoñe tšabá yontsemna ca, er tšëngaftanga šmondmëna Bëngbe Bëtsábenga, nÿe cha jtseservénama.

4

Ntšamo jtsiyenama, Bëngbe Bëtsá oyejuayá chaotsemnama

¹ Y mora inÿe palabra šmochjatspaséncia. Jesucristbeyeca bëngbe catšátanga, tšëngaftanga bëngbentsana šmonjanatsjinÿe ntšamo jtsiyenana cmojánamna, ntšamo Bëngbe Bëtsábioye oyejuayá jabemama yomncá, y ndegombre chca tšëngaftanga šmondoyena. Y mora Bëngbe Utabná Jesusbe cuenta, cbontsaimpadana y becá cbontsëtsëtsná más chca chašmotsamama.

² Tšëngaftanga šmondëtatšëmbo ndayá tifjánayana ntšamo tšëngaftanga chašmotsiyenama, y chca fsënjanma Bëngbe Utabná Jesús chca jamama šonjanamëndáyeca. ³ Bëngbe Bëtsá endboše tšëngaftanga chašmotsiyenama mo

Bëngbe Bëtsabengcá, ndocná bacna soyënga boyabása o shembásaftaca chaondëtsamama,

⁴ y nÿetscanga chamotsobena ntšamo canÿe shema jonguanguana, chë ntšamo canÿa Bëngbe Bëtsábia yomná jamama ibomncá, y ntšamo entšangbe bominiñe tšabá yomncá, ⁵ y ndoñe chabondónguango nÿe cháftaca bacna soyënga chëngbe cuérpoca jamama, ntšamo chë Bëngbe Bëtsábioye nduabuátmënga mondbetsamcá.

⁶ Chë palabriñe ndocná chabe catšátbioye

chabondëingñé, chë catšatbe shémaftaca bacna soye jamëse, er chca amëngbioye Bëngbe Utabná corente echanjácastigaye. Chíyeca bënga ya bëtscá chama tcbonjabuayená. ⁷ Er Bëngbe Bëtsá ndoñe šonjánachembo bacna soyënga boyabása o shembásaftaca jtsamama, ndayá ntšamo tšabá yomncá jtsamama, ntšamo chabe entšanga mondbetsamcá. ⁸ Mëntšá, nda quem buatëmbana soyënga tojtsábotena, cha ndoñe nýe entšanga jtsëbátenana, ndayá Bëngbe Bëtsábioye, nda tšëngaftangbe ainaniñe Uámana Espíritu cháumashënguama tojama.

⁹ Atše ndoñe quešnátsmëna juabuábiamana ntšamo cmojtsamna ínýenga Jesucristbeñe ošbuáchiyënga jtsababuánýeshanama, er cach Bëngbe Bëtsá tcmonjabuatambá nýetscanga chašmotsenbobonshánama. ¹⁰ Y ndegombre, tšëngaftanga chca šmondama nýetsca Macedonia luarentše Jesucristbeñe ošbuáchiyëngaftaca. Pero cbontsaimpadana, Jesucristbeñe catšátanga, más chca chašmotsamama.

¹¹ Nýa sempre quem soyënguiñe šmochtsentšena: natjëmbana jtsiyenana, ínýengbe soyënguiñe ndoñe ntsontremeténana, y ndoñe ntjatobatmanana nýe ínýenga tšëngaftangbiamama chamotsetrabájama, ntšamo tcbonjanëyancá tšëngaftangaftaca fsënjamna ora; ¹² chca šmochtsama, chë ínýenga Jesucristbeñe ndošbuáchiyënga chacmotsarrespetánama, y ndocnábeñe ntjatobatmancá šmochantsobena jtsiyenana.

Bëngbe Utabná quem luaroye yochjésabo ora

13 Bëngbe catšátanga, bënga fsëntseboše tšëngaftanga ndegombre chašmotsetátšëmbo ntšamo chë obanëngaftaca yochjopásama, y chca, tšëngaftanga ndoñe ngmenánaca chašmondëtsemnana, mo chë injëngcá, chë tcojóbanentšana ndoñe yontsemna jtayenama ca juabnayëngcá. 14 Bënga fsëndošbuaché Jesús tojanóbana y tojtanayenama, y cachcá bënga fsëndošbuaché chë tmojóbanënga y Jesúsbeñe tmojtsošbuáchese, Bëngbe Bëtsá chëngbiana yochjama chë nyetsca tescama yomna tšabe vida Jesucrístoftaca chamotsebomnana, y quem luaroye cháftaca chamuatábama.

15 Chë soyama bënga cbontsëtsëtsná ntšamo cach Bëngbe Utabná tojëftsanabuatambacá: Bëngbe Utabná chaojésabo ora, chë ošbuáchiyënga chë te cabá ainënga chamojtsemnënga, chábioye ndoñe quemochátinýena tsbanánoca, más natsana chë ya obanënga chë te mochtayenëngbiana. 16 Er entšanga mochanjouena canýe mando juayebuáchenana, chë angelëngbe amëndayabe oyebuambnayana y chë Bëngbe Bëtsabe trompetéfjua juajatëtámna, y chora cach Bëngbe Utabná celocana echanjástjango. Y chë tmojóbanënga, Crístbeñe imojanošbuachenga, natsana mochántayena; 17 chentšana, chë ainënga chamojtsemnënga chëngaftaca cánýiñe Bëngbe Bëtsá šochanjúyamba, Bëngbe Utabná yochtsemnoca jashjanguama, chë celoca jantšetëshënga endmënoca; as chentšana nyetsca tescama cháftaca bënga mochántsemna. 18 Quem palabrëngaca nyetscanga ndoñe más ngménana

ainaniñe chašmondětsebmna.

5

¹ Jesucristbeyeca catšátanga, ndoñe quenátsiyta atše jubuábiamana mocna ora chë soyënga yochjopásama. ² Cach tšëngaftanga corente šmondětatsëmbo, Bëngbe Utabná yochjésabo chama ndocná chaondětsejuabná ora, mo canye atbëbanacá jashjanguana ibeta ndocná chama tonjatsjuabná ora. ³ Entšanga chamojayana: “Lempe tšabá endëtsomñe y tondayama quešnátamna játauatjana ca”, chora nye ndeolpe chë entšangbiamna tša jasúfriama echanjóshjango, mo canye shembása šešona jtsebomnama ora nye ndeolpe jasúfriama jontšancá; y ndegombre, entšanga chca jasúfriama quemochatotsbocá. ⁴ Pero tšëngaftanga catšátanga, ndoñe quešmátiyena mo ibetiñcá, bacna soyënga jtsejuabnayëse y jtsamëse; y chca, Bëngbe Utabná chaojésabo ora, tšëngaftanga ndoñe auatjanánënga quešmochátsmëna, mo ndábioye canye atbëbaná tbojotbá ora, chábioye cuaftsauatjanacá. ⁵ Nyetsca tšëngaftanga šmondmëna entšangbe juabna binynayabe básenga, y mo binyniñcá šmondoyena. Bënga ndoñe chë ibetiñe mandayabe básenga quemuátsmëna, y mo ibetiñcá ndoñe quemuátiyena; ⁶ chíyeca bënga ndoñe quešnátamna jtsemnana mo chë cachëngbe cuerpo jenomándama ndobenëngcá, chë mo cuaftsemangcá oyenënga. Pero aiñe šontsamna mo chë fšnëngcá jtsiyenana, bëngbe cuerpo jtsemándayëse y nyets tempo jtseprontánëse. ⁷ Ibeta ora entšanga jtsemangana, y cach ibeta

tojtsemna ora entšanga jotmenangana; ⁸ pero bēnga, chē binyēntšēngna, šontsamna sempre bēngbe cuerpo jtsemāndayana. Sontsamna Bēngbe Bētsábeñe jtsošbuáchiyana y cha jtsebobonshánana, chē uyaná Satanasbiana jenēuyanama y cha jayējanama, mo canye soldadca, canye morochó soye cochaca jenácochjatsana jtsevalentiana y ndoñe chamondēyējanama. Y chē castigüentšana Bēngbe Bētsá šochjātsebacamnaca puerta jtsošbuáchiyēse jtsošbátmanana; y chca, bēnga mochántsemna mo canye soldadca, cha canye casquēse juabuchētsana jenēuyanama. ⁹ Er Bēngbe Bētsá ndoñe šonjáchembo bēnga chašotsamnama chē nyetsca tescama castigo jtsebomnama. Ndayá Bēngbe Bētsá šojabacacá, Bēngbe Utabná Jesucristbeyeca bēnga chamótsbocama. ¹⁰ Cha bēngbiana tojanóbana, bēnga cháftaca cányiñe jtšiyenama chamotsobenama, masque ainēnga o obanēnga chamojtsemnēse, cha chaojésabo ora. ¹¹ Chíyeca, nyetscanga šmochtsenañémuaye y šmochtsenájabuachana más jtsošbuáchiyama, ntšamo tšēngaftanga mora ya šmontsamca.

Pablo choca ošbuáchiyēnga jábuayenama

¹² Jesucristbeyeca catšátanga, cbontsaimpadana chašmotsarrespetana chē Bēngbe Bētsabiana tšēngaftangbeñe trabajayēngbioye, y chē Bēngbe Utabná tšēngaftanguentše tojábacacanga uánatsanēnga chamotsemnama y ntšamo jtšiyenama cmojtsamnama chácmbuayenama. ¹³ Cmontsamna chēnga jtšarrespetánana y jtšababuányēshanana, ndaye trabajo chēnga

imojtsamama. Natjěmbana n̄yetscángaftaca
šmochtsiyena.

14 Quem soyěnga chašmotsamámna
cbontsaïmpadana: jatrabájama ndoñe
tmontsebošěngbioye šmochjucácana, añemo
ndbomněngbioye šmochjáñemuaye, bětsá
ošbuáchiyana ndbomněngbioye šmochjújabuache,
y uantaděnga n̄yetscángaftaca šmochtsemna.

15 Cuedado šmochtsebmna, nderado nda
bacna soye tbojaborlase, ndocná ndoñe
cachcá chabondětachnēnguama. Masna, n̄ye
šmochtsentšena n̄yets tempo tšabe soyěnga
jtsamama cach tšěngaftanguentšěngaftaca y n̄yetsca
entšangaftácna.

16 N̄yets tempo oyejuayěnga chašmotsemna.
17 Sempre Běngbe Bětsáftaca šmochtsencuéntaye.
18 N̄yetsca soyěnguiñe Běngbe Bětsá
šmochtsatschuanaye; er chca entsemna
ndayá cha yojtseboše, běnga Cristo Jesúsbeñe
ošbuachiyěngcá chamotsamama.

19 Ndoñe šmattsama ntšamo chě Uámana Espíritu
tšěngaftangbeñe yojtsamcá chaotsopochocama.

20 Ndoñe šmattsábotena chě Běngbe Bětsabe
juabna oyebuambnayěngbe buayenana soye.

21 Yeuana šmochjúabuoye y šmochjayana, chě
Běngbe Bětsabe juabna oyebuambnayá yomna
ca tojtsichamuabe buayenánama ndegombre
Běngbe Bětsábiocana tayóbocanama, y chentša
tšabe soyěnga šmochjobuajo y sempre chca
šmochtsama. 22 N̄yetsca bacna soyěnguentšana
šmochtsojuánañe.

23 Cach Bëngbe Bëtsá, chë bëngbe ainaniñe tšabe ebionana chamotsebomnama endamá, nÿetsca soyiñe tšábenga chacá chacmabiamá, y nÿets tšëngaftangbe espíritu, ainana y cuerpo chaotsinÿena, Bëngbe Utabná Jesucristo chaojésabo orscama; y chora, ntšamo tšëngaftanga šmojamama bacna soyënga yojtsemna ca ndocná chaodayanama. 24 Nda tcmojúbuaja chábenga chašmotsemnama, cha sempre jtsamana ntšamo tojayancá, y lempe cha echanjama.

Inÿe rueguënga chëngbiamá y jtadiósoftanama

25 Jesucristbeyeca catšátanga, Diosmanda, bëngbiámnaca Bëngbe Bëtsá šmochtseimpadana.

26 Nÿetscángbioye mo Jesucristbeyeca catšatangcá šmochjácheuaye, jtenámochëse, ntšamo cach tšëngaftangbe pamíllanga puerte bonshanánaca šmondbetsacheuanaycá.

27 Cbontsamënda quem tsbuanácha nÿetsca Jesucristbeñe ošbuáchiyënga chašmëbuáliama, y chca séntsama, Bëngbe Utabná chca jamama šojanmandáyeca.

28 Atše sëntseimpadana Bëngbe Utabná Jesucristo, chaoma tšabe bendicionënga tšëngaftangbeñe chaotsemnama.

Bëngbe Bëtsa Cabëngaftaca Entsoyebuambna New Testament in Camsá

copyright © 2009 Wycliffe Bible Translators, Inc.

Language: Camsá

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Camsá

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-05-05

PDF generated using Haiola and XeLaTeX on 11 Nov 2022 from source files
dated 29 Jan 2022
19104c0e-9046-5ff3-82fb-eb838c88dcf9